

■ PLAID PER LA DUMENGIA

Il niev Jerusalem

DA ANDRI CASANOVA

Oz ha in noviz la plema enta maun. Sco student da teologia emprovel jeu pia da far enqual patratg cun e per Tei. In cordial invit a quell'aventura!

Tgei fa pia in teolog, silmeins in tal da confessiun roman-catolica, sch'el ha da preparar in priedi ni da scriver in plaid per la dumengia? – El tschappa beinbuengen in cudisch che cuntegn ils texts biblics ella successiun e constellation sco els vegnan legi mintgamai enteifer las messas, quei ei il schinumnu lezziunari. – In secuntener pulitamein mecanic sch'ins considerescha ch'il Spèrt sogn ei daus a nus tuts!

L'idea dad haver sigl entir mund in soli lezziunari intenda denton che tut las parts dil mund seconfrentien mintgamai culs medems texts biblics. Sche nus udin pia dumengia il raquent dallas nozzas a Cana,

lu savein nus ch'era Luíz ella Brasilia, Nanami el Japan, Kanene ella Nigeria ed Emily ell'Australia audan exactamein il medem.

Ussa propona il lezziunari per dumengia era in passadi ord il cudisch Jesaja (cf. Jes 62, 1–5). Jeu hai legiu quellas lingias in tschuat gadas. Forsa anfla Ti era in bien mument per leger e meditar quels plaids dil profet, scretts avon varga 2500 onns.

Diu para da quescher en quellas lingias ed il salit empermess semeglia lontans. Il profet perencunter sa buca quescher e fa sfracs. Jeu sevilentass medemamein sch'jeu savess da schabets miraculus che duessen daventar e vesess co schuberlidi nuot da quei secumpleina. Vina von dat il profet, probablamein cun egl tarlischonts, in schatg da quei salit empermess. El plaid da da quei schinumnu niev Jerusalem.

Jeu hai l'idea ch'ei sto settractar cheu d'enzatgei magnific. Jeu savess meditar quels plaids pleins d'ardiment aunc tschien gadas. Ins sa s'imaginar ei sco enzatgei grondius, sco ina immensa letezia, sco quei mument cu dus s'inamureschan.

Mo tgei visiun ha il profet Ma von el? Tschontscha el da Nadal, pia dalla vegnida da Niessegner? Ni dil spindrament dil mund entras mort e levada da Cristus? Ni d'enzatgei che schai aunc el futur? Ni forsada dad eveniments che capetan ella veta dil singul carstgaun? Ni schizun da tut quellas caussas enina?

Basta, jeu mediteschel aunc in mument ils plaids dil profet. – Sche jeu passentel egl avegnir muments da legria sche vi jeu engraziar a Diu per quests regals, magari era cun in larmin els egl. E sche jeu hai da semudergiar per in motiv u l'auter sche astgel jeu per franc era alzar la vusch enviers Diu.

■ OPINIUNS

Stai si, defenda e sedefenda!

Eis ei buc in factum deplorabel che tontas postas e staziuns de viafier han stuiu serrar lur portas ils davos onns e quei schizun en loghens nua che quellas purtavon aunc gudogn? Buns posts de lavur ein aschia svani ord loghens nua che quels fussen stai d'impurtonza locala vitala. Consequenza da quei fatg ei era stau che stizuns pintgas e fors era in'ustria ni in menaschi han stuiu ceder. Jeu sedamondel vesend quei cuntinuau trest svilup: «Tgei savein nus singuls aunc far per frenar quei moviment silmeins en nossa atgna vischinonza?» Fuss quei fors mo in cumbat encunter mulins da vent?

In schabetg d'ordeifer

In interessant cass davart il qual jeu hai legiu buca ton daditg savess fors survir cheu sco muossavia: Ils 21 da december vargau ha la gasetta locala da mia regiun, la «Limmatler Zeitung», rapportau ch'els habitonts da Bergdietikon, ina vischnaunca argoviana, hagian rimnau suttascripziuns per buca schar serrar lur posta locala. Motiv ei stau la visada a lur cau de posta. «Per

cass ch'in schef da posta va vegn la direziun della posta probablamein a ponderar schebein ei rendi aunc da menar quella vinavon.» Quei havevan ils habitonts para intervegniu d'autras vischnauncas. Cun ina petiziun vulan ins aschia far paleis, avon che la posta concludi ina serrada, tgei impurtonza ch'in uffeci postal ha per il liug e che quel munti per els uss ed el futur bia dapli che mo fatschenta da profit. Per mei ei quei in'exemplarica acziun che demonstrescha la forza dil singul burghais, digl engaschament dils ufficials ed in summa de nies sistem democratic. Jeu sun fetg spanegiaus tgei success che quella acziun vegn ad haver. La vischnaunca de Bergdietikon dumbra tonaton varga 2000 habitonts!

Mantener l'infrastructura

Stradun e viafier ein dus mieds che duessen completar in l'auter e buc esser concurrenza. Sco ils emploiai da viafier ella regiun dil marcu da Turitg vein eranus passagiers fatg stem dacuort che gia per consequenza d'ina mudesta nevada haveva in grond diember d'automobi-

lists fatg diever della viafier enstagl digl auto. Actualmeins frequentan entochen 400 000 passagiers a di la staziun principala da Turitg. Per igl onn 2020 quantan ei cun ina frequenza quotidiana da schizun miez milliun persunas.

Era ellas regiuns perifericas fagess ei nuota donn, e quei fuss era el senn dil schurmetg digl ambient, de schar igl auto mintgaton a casa e de viagiari pli emperneivel cul tren. A mi dat da paterterg cu jeu viageschel tras la Surselva ed audel el tren la vusch «Fermada sin damonda». Pilver, en certas staziuns san ins observar in mudest diember da persunas che sortan ni entran el tren. Lu sedamondel jeu mintgamai: «Con ditg cuoz ei aunc entochen che la vusch menziunada ei en quest liug danvonz?» Lein sperar che era cheu, nua ch'in niev prighel de sperdita da valur locala s'annunzia, ch'il singul e ch'els gremis responsabels possien agir el dretg senn ed era ch'els aulzien la vusch ad uras e possien aschia contribuir al beinstar da lur vitgs e da lur vischnauncas.

Rafael Caduff, Dietikon/Tavanasa

Encuret: La Ligia Romontscha

Igl atun vargau ha in prominent ed engaschau Romontsch proclamau publicamein: «La Ligia Romontscha exista buca.» Il president da quella ha lu era schau valer quei indirectamein – autramain vess el buca salidau nus delegai a Casti sco «fantoms».

Sin instanta supplica d'in delegau, era lez di, da s'engaschar per segir finanziamein igl avegnir dalla Chasa Editura Rumantscha (CER) ha la reacziun dil president schau spitgar pauc bien. E cuort sissu eisi lu era schabegiau. Ina sera annunzia il Radio Rumantsch che la menadra dalla CER seigi vegnida relaschada. Jeu sun staus schocaus terriblamein igl emperment, manegiond denton ch'ei settracti d'ina visada preventiva. Mo nuot da quei. Ella veva propi survegniu la brev blaua dalla LR che ha attestau ad

ella – en in nunsuperabel cinissem – d'haver fatg in superjob. Laud per la menadra ei dil reminent era vegnius da pliras varts involvidas.

Jeu sun aunc mai s'irritau sco quella sera sur dalla LR, per quei ch'ella ha giu temps treis onns da procurar finanziamein pigl avegnir dalla CER – mo fatg nuot. Sin mia damonda a cuss. gov. Martin Jäger, tgei che schabegi cun la CER, ha el rispundiu il december che surlunder vegni discurriu il proxim temps cun la LR. Cuort avon veva el denton schau citar el «Bündner Tagblatt» ch'ei seigi stau fetg difficil dad era mo saver fixar in termin persunter cun la LR.

La relaschada dalla menadra – e cun quei era la fin dalla CER en sia structura efficianta da tochen ussa – ha effectuai giustificadamein critica massi-

va alla adressa dalla LR. Igl entir cussegl editorial – nossas corifeas en fatgs da litteratura – ei seretratgs ed ha sez fatg grondas renfatschas alla LR davart il munchentau e tralasciau. Lezza ha reagiu cun ina declaronza da nuot.

Sonda vargada ei era il «Palaver» el Radio Rumantsch s'exprimius el medem senn, sustened il cussegl editorial ed anflond predicats pauc flattonts per president e secretari dalla LR.

Facit: Ei regia generalmeins buca mo gronda malcontentientscha cun la LR, mobein schizun profunda indignaziun.

Jeu sai buca sche la midada da suprazionza dalla LR ei gia succedida all'entschatta da quest onn. Ins ha udiu nuot e silla pagina d'internet dalla LR paradescha en mintga cass aunc la suprazionza veglia. Giuseppe Capaul, Mustér

■ NOVITADS WWW.RTR.CH

Confederaziun duai cumbatter la mancanza d'abitaziuns

Locataris na duain betg stuair pajar il quint per la libra circolaziun da persunas. Ensem cun la Partida socialdemocratica ed ils verds pretenda l'associaziun da locataris che la confederaziun fetschia insatge cunter la mancanza d'abitaziuns e cunter tschains da locaziuns che s'augmentan. Ina proposta è da stgaffir en citads ed aglomeraziuns cun paucas abitaziuns zonas d'abitare en las qualas in tschert pertschient da la surfatscha d'abitare resta reservà per abitaziuns bunmargadas. Ultra da quai duai la confederaziun promover la construcziun d'abitaziuns d'utilitad publica.

«Mobilitad è bler memia favuraivla»

Ir cun l'auto, ir cun il tren ed era sgular saja bler memia bunmargada. E tar las ovras socialas saja necessari in frain da debits. Quai èn ils messadis principals dal nov schef dad Economiesuisse, Rudolf Wehrli. A chaschun da la conferenza da medias annuala da l'uniun tetgala da l'economia ha ditg Wehrli che la persistenza saja il tema central per ses emprim onn en uffizi. Tenor Wehrli vegniss la mobilitad nizzegiada pli raschunavel sch'ella fiss pli chara. Per il sistem social propona el temps da lavur en media pli lungs. En pli duai vegnir pli flexibla la vegliadetgna da renta.

Adversaris da la lescha d'epidemias han inoltrà referendum

Sur da la lescha d'epidemias decidan pli probabel las votantas ed ils votants en Svizra. Ils comités da referendum quantan d'avair rimnà las 50 000 suttascripziuns necessarias per la votaziun. Els han inoltrà quellas a la chanzlia federala a Berna. Critigada vegn surtut l'obligaziun da vaccinaziun. Davos il referendum stat principalmain Daniel Trappitsch, il praticer che lavura cun metodas natiralas. La confederaziun vul cun la revisiun da la lescha d'epidemias surtut ina meglra protecciun cunter malsognas transmissiblas sco per exempel la gripa da portgs.

Puspè in zic dapli ch'han fatg servetsch civil

L'onn passà han dapli che 5100 persunas survegnì da nov la lubientscha da far servetsch civil. Quai è radund 470 dapli che l'onn avant, ha communitgà il servetsch civil svizzer. En tut han radund 15 000 persunas fatg l'onn passà servetsch civil en Svizra durant total 1,2 milliuns dis. Lavurà han els surtut en ospitals, chasas d'attempads, instituziuns per uffants u juvenils sco er en favur da l'ambient.

Leuthard vul reducir emissiuns mundialas d'argient viv

La cussegliera federala, Doris Leuthard, pretenda mesiras pli effizientas cunter il diever d'argient viv. A chaschun d'ina sesida dal program d'ambient da las Nazions unidas a Geneva è Leuthard s'engaschada per ina cunvegna per reducir las emissiuns mundialas d'argient viv. La cunvegna stoppia cuntegnair mesiras per il sustegn tecnic e sustegn finanziar. Ultra da quai stoppian ins serrar minas per reducir l'explozaziun d'argient viv, uschia Leuthard. La cunvegna d'argient viv sa basa sin in'iniziativa da la Svizra. Las con-

tractivas han cumenzà la dumengia e duain durar pli probabel fin oz. Lura decidan ils 147 stadis che sa participeschan a la sesida davart la cunvegna. La cunvegna prevesa da reducir effizientamain las emissiuns mundialas d'argient viv da prest 2000 tonnas ad onn. Argient viv è in metal grev che n'è betg decumponibel e ch'è da tissi.

Dapli svieuta tar il Volg

La gruppa da commerzi en detagl, Volg, ha augmentà la svieuta l'onn passà per 2,4 pertschient sin radund 1,4 milliardas francs. A medem temp saja il sortiment vegnì per 0,7 pertschient pli bunmargada, ha communitgà la gruppa da commerzi en detagl a Winterthur. Il dumber da las butias hajan ins augmentà l'onn passà per 26 sin total 916. Volg tutga sco il commerziar en detagl Landi e la firma d'iel Agrola al concern agrar Fenaco.

3% dapli svieuta per Galenica

La gruppa da farmazia Galenica ha fatg l'onn passà ina svieuta da 3,3 milliardas francs, quai è in plus da 3%. S'augmentada il pli fitg è la sparta logistica. Il gudogn net n'ha Galenica anc betg communitgà, l'interpresa quinta dentant da cuntanscher almain il gudogn da l'onn da fatschenta 2011. Uschia fissi la 17avla giada en roda che l'interpresa pudess publitgar in augment dal gudogn.

Libor Voncina daventa nov schef da Sunrise

Il concern da telecomunicaziun Sunrise ha in nov schef. Libor Voncina remplazza per immediat Oliver Steil che maina l'interpresa dapi il 2010. Sco quai che Sunrise fa da savair va il contract da Steil a fin ed el sa deditgescha ad autras sfidas.

Nivel da pretschs è sa sbassà l'onn da fatschenta 2012

Il nivel da pretschs dal commerzi a l'engrossa è sa sbassà l'onn passà. La chareschia media è stada minus 1%. La gronda part dals products saja stad pli bunmargada, ha communitgà l'Uffizi federal da statistica. Cuntant han custà pli pauc products farmaceutics, products da metal, computers ed equipament e maschinas electricas. Dapli han ins stui pajar l'onn passà surtut per products d'iel e per gas.

Dapli gudogn e svieuta per SGS il 2012

Il pli grond concern da controlla ed inspeziun da rauba dal mund SGS da Geneva ha augmentà l'onn passà il gudogn per 1,5% sin radund 560 milliuns francs. La svieuta è s'augmentada per bunamain 15% sin 5,6 milliardas. Ins haja cumprà l'onn passà 18 firmas, ha communitgà SGS.

Roger Federer ha cuntanschì terza runda

Roger Federer è en la terza runda da l'Australian Open. El ha gudagnà la partida cunter il Russ Nikolai Davydenko en trais sets cun 6:3, 6:4 e 6:4. La partida ha cuzzà radund duas uras. Il proxim adversari da Roger Federer è Bernard Tomik da l'Australia, il numer 43 dal mund.